

共同經課 - 1 以賽亞書五十五章四節~九 a 節

4 主耶和華賞賜我受教示 ê 舌, hō 我知怎樣用言語扶助厭倦 ê 人; 主 ták 早起叫醒, 叫醒我 ê 耳孔, hō 我能聽, 親像受教示 ê 人一樣。5 主耶和華開通我 ê 耳孔, 我並無違逆, 亦無退後。6 人 phah 我 ê ka-chiah-phiaⁿ, 我 chhut-chāi 伊 phah; 人 chhoah 我嘴 phoé ê 嘴鬚, 我 chhut-chāi 伊 chhoah; 人凌辱我, kā 我 phùi-noā, 我亦無掩面。7 因為主耶和華的確幫贊我, 所以我無見笑; 為 tiòh án-ni, 我 hō 我 ê 面硬親像 tēng 石; 我亦知我的確無致到漏氣。8 稱我做義 ê 近 lah; chī-chūi kap 我相爭? 伊 thang kap 我相 kap khiā; chī-chūi 做我 ê 對敵? 伊 thang 就近我。9 看 ah, 主耶和華 beh 幫贊我, chī-chūi 能定我有罪 ah?

共同經課 - 2 詩篇三十一篇九節~十六節

9 耶和華 ah, 我 tī 患難中, 求你憐憫我; 我 ê 目矚因為憂悶 phah-pháiⁿ, 我 ê 心神, 我 ê 身體, 亦是 án-ni。10 我 ê 性命因為憂苦來消無, 我 ê 年歲為 tiòh 吐氣亦 án-ni; 我 ê 氣力因為我 ê 罪惡來衰 lám; 我 ê 骨頭亦枯焦。11 我因為我一切 ê 對敵成做凌辱; Tī 我 ê 厝邊 tau koh-khah 傷重; hiah-ê bat 我 ê 人 lóng 驚我; Tī 外面看見我 ê 人走閃離開我。12 我親像死人 hō 人 boē 記得, 無人 siàu 念; 我親像破碎 ê 器具。13 因為我聽見 choē-choē 人 ê 謾謗, 四圍 lóng 是驚惶; In 相 kap 參詳攻擊我 ê 時, 就計謀 beh 害我 ê 性命。14 耶和華 ah, 我猶原 oá 靠你; 我講, 你是我 ê 上帝。15 我 ê 遭遇 tī 你 ê 手; 求你救我脫離我 ê 對敵 ê 手, 以及窘迫我 ê 人。16 求你 hō 你 ê 面照光你 ê 奴僕; 照你 ê 慈愛拯救我。

共同經課 - 3 腓立比書二章五節~十一節

5 Lín tiòh 有基督耶穌 ê 心做心; 6 伊本有上帝 ê 形狀, 無掠 kap 上帝平等做所 tiòh 執守 ê, 7 反 tng piàⁿ 空家己, 取奴僕 ê 形狀, 成做人 ê 樣相; 8 已經有親像人 ê 款式, 就屈家己, 順服到 tī 死, 甚至死 tī 十字架。9 所以上帝高升伊極高, 賞賜伊 hit-ê 名, poāⁿ 過 tī 萬名 ê 頂面 ê; 10 hō 見若 tī 天, tī 地, kap tī 地下 ê, tī 耶穌 ê 名, 無一個腳頭 u m̄ 跪拜, 11 無一個嘴 m̄ 稱呼耶穌基督做主, 來歸榮光父上帝。

共同經課 - 4 路加福音二十三章一節~四十九節

1 In 全會 ê 人 lóng 起來, 帶伊到彼拉多 ê 面前; 2 告伊講, 阮看 chit 人迷惑阮 ê 百姓, 禁人納稅 hō 該撒, 家己稱做基督, 做王。3 彼拉多問伊講, 你是猶太人 ê 王 mah? 應伊講, 你講, 就是。4 彼拉多 tui hiah-ê 祭司頭 kap Kui 陣 ê 人講, 我看 chit 人無罪。5 總是 inná 出力講, 伊搖動百姓, 遍猶太傳教, tui 加利利起到 chia。6 彼拉多一下聽見, 就問看 chit 人是加利利人 á m̄ 是。7 已經知伊屬 tī 希律所管轄, 就送伊 hō 希律; hit 時希律也 tī 耶路撒冷。8 希律看見耶穌就真歡喜, 是久久 ài 看見伊, 因為 bat 聽見伊 ê 事, kohng3 望看見伊行神蹟。9 就用 choē-choē 話問伊; 但是耶穌無應伊一句。10 Hiah-ê 祭司頭 kap 經學士 khiā-teh, 出力告伊。11 希律 kap 伊 ê 兵目底無伊, 戲弄伊; 用 súi ê 衫 kā 伊穿, koh 送還彼拉多。12 希律 kap 彼拉多平時結怨, hit 日就做朋友。13 彼拉多召 hiah-ê 祭司頭, kap 有司 chham 百姓來, 14 對 in 講, Lín 帶 chit-ê 人到我 chia, 講伊是迷惑百姓 ê; 你看, 我 tī lín ê 面前已經審問伊; 總是論到 lín 所告伊 ê 事, 我查出伊 lóng 無罪。15 希律也是 án-ni; 因為有將伊送還咱; 也你看, 伊所行無一項應該死 ê 事。16 所以我 behphah 來 tháu 放伊, 17.18 In 一齊喉叫講, Tiòh 除去 chit-ê 人, 放巴拉巴 hō 阮。19 Chit-ê 巴拉巴, 因為 tī 城內作亂 koh thài-死人, chiah 關落監。20 彼拉多 ài 放耶穌, 就 koh kap in 講。21 但是 in 叫, 釘伊十字架, 釘伊十字架。22 彼拉多第三 pái 對 in 講, 是怎樣? 伊有行甚麼 pháⁿ? 我看伊無一項應該死 ê 罪; 所以 behphah 來 tháu 放伊, 23 In 大聲迫切求釘伊 tī 十字架。In ê 聲 khah 贏。24 彼拉多擬斷照 in 所求 ê 來行: 25 就 tháu 放 in 所求 hit-ê 為 tiòh 作亂續 thài 死人關落監 ê; 將耶穌交 in, 來順 in ê 意思。26 帶耶穌去 ê 時, 有一個 Kó-lī-nāi ê 人, 西門, tui 鄉下來, in 就 khiú 伊來, 將十字架掛 tī 伊 ê 肩頭, hō 伊 giā 來 tè 耶穌。27 Tè 伊 ê 人有百姓 kap 婦人人 choē-choē, 婦人人為 tiòh 伊搥胸哀傷。28 耶穌 oát 頭對 in 講, 耶路撒冷 ê 婦人人 ah, 莫得為 tiòh 我啼哭, tiòh 為 tiòh lín 家己 kap 家己 ê Kiáⁿ 兒來啼哭: 29 因為時 beh 到, 人 beh 講, boē 會懷孕 ê 婦人人, bē bat 生產 ê 胎, bē bat hō gín-ná suh ê 奶頭, 有福氣。30 Hit 時人就 beh 對山講, Teh 阮; 也對山 á 講, 蓋阮。31 因為 tī 青 ê 樹木若行 án-ni, 就 tī 乾 ê 樹木 beh 怎樣 ah? 32 Koh 有兩個犯人 hō 人帶去, kap 耶穌同受死。33 到一所在名叫頭殼碗, 就 tī hia 釘伊 tī 十字架; koh 釘 hiah-ê 犯人, 一個 tī chiāⁿ-pêng, 一個 tī tò-pêng。34 耶穌講, 父 ah, 赦免 in, 因為 in 所做 ê, in m̄ 知。人就 liam-khau 分伊 ê 衫。35 Hiah-ê 有司譏刺伊講, 伊 bat 救別人; 若是做上帝 ê 基督, 受揀選 ê, tiòh 救家己。36 兵丁也戲弄伊, 近 oá 用醋 hō 伊, 37 講, 你若是猶太人 ê 王, tiòh 救家己。38 Tī 伊 ê 頂面有斬條寫講, chit-ê 是猶太人 ê 王。39 受吊 teh ê 犯人一個褻瀆伊, 講, 你 Kiám m̄ 是基督 mah? Tiòh 救家己 kap 阮。40 第二個應來責備伊, 講, 你既然同受罪, 連上帝也 m̄ 驚 mah? 41 咱受罪是公道; 因為咱所受 ê 合 tī 咱所行; 但是 chit 人所行 ê, 無一項 m̄ tiòh。42 就講, 耶穌 ah, 你 tī 你 ê 國來 ê 時, tiòh 記得我。43 耶穌就 kā 伊講, 我實在 kā 你講, 今 á 日你 beh kap 我 tī 樂園。44 日中晝, 全地烏暗; 到三點鐘 ê 時, 日 ê 光無去; 45 殿內 ê 帳 tui 中裂開。46 耶穌大聲叫, 就講, 父 ah, 我 ê 神交代你 ê 手。Chiah-ê 話講 soah, 氣就斷。47 百總看見 chit-ê tai-chì, 歸榮光上帝, 講, Chit-ê 真正是義 ê 人。48 聚集 teh 看 ê 眾人看見 chiah-ê tai-chì, lóng 搥胸 tò 去。49 Hiah-ê Kap 耶穌相識 ê, 以及 hiah-ê tui 加利利 tè 伊來 ê 婦人人, lóng 遠遠 teh khiā, 來看 chiah-ê 事。